

【賀知章。見全唐詩一百十二。】

01

—
曉發

江臯聞曙鐘，輕棹理還舡。
海潮夜約約，川露晨溶溶。
始見沙上鳥，猶埋雲外峰。
故鄉杳無際，明發懷朋從。

02

—
采蓮曲

稽山罷霧鬱嵯峨，鏡水無風也自波。
莫言春度芳菲盡，別有中流采芰荷。

03

—
答朝士

銀鑊銀盤盛蛤蜊，鏡湖蓴菜亂如絲。

鄉曲近來佳此味，遮渠不道是吳兒。

【包融。見全唐詩一百十四。】

04

—

阮公嘯臺

荒臺森荆杞，蒙籠無上路。

傳是古人跡，阮公長嘯處。

至今清風來，時時動林樹。

逝者共已遠，升攀想遺趣。

靜然荒榛門，久之若有悟。

靈光未歇滅，千載知仰慕。

05

—

和陳校書省中翫雪

芸閣朝來雪，飄飄正滿空。

褰開明月下，校理落花中。

色向懷鉛白，光因翰簡融。

能令草玄者，迴思入流風。

【張若虛。見全唐詩一百十七。】

06

—
代答閨夢還

關塞年華早，樓臺別望違。

試衫著煖氣，開鏡覓春暉。

燕入窺羅幕，蜂來上畫衣。

情催桃李豔，心寄管弦飛。

妝洗朝相待，風花暝不歸。

夢魂何處入，寂寂掩重扉。

【張旭。見全唐詩一百十七。】

07

—
清谿泛舟

旅人倚征棹，薄暮起勞歌。

笑攬清谿月，清輝不厭多。